



Bon nochi drumi dushi

Exitoso weekend di cuenta di hada

E weekend di 29 y 30 di augustus 200 mucha hunto cu nan mayor a gosa di diferente cuenta di hada na Centro di Bario Noord. Despues di dos presentacion di Tanto Cuenta den bario, e prome a tuma luga na Scol di Arte na San Nicolas den luna di april.

E contadonan experiencia a transforma e escenario di Centro di Bario Noord den un berdadero mundo magico, cu su Castilla y figuranan di cuentanan di hada conoci, manera Capa Cora, Hans y Greta, e Sapo Prins, Sneeuw Blanco y e Pushi cu boots.

E magia riba escenario a toca e contadonan mes tambe, asina nos por a gosa di e storia di e Sapo Prins conta door di

Hada Diana y Hada Caluda. E sapo gordo, vies tur lebelebe, cu a saca e bala di e prinses for di dam, ta resulta di ta e prins bon tipo cu ta casa cu e prinses despues.

Contado Richard a dreña e figura di E pushi cu boots hopi sabi pa conta con e ta uza yen di triki pa gara un coneu gordo y diki y otro delicia pa hiba pa e markes di Carabas. Den e ultimo storia; Hans y Greta, Hada Martica y Bruha Lupita a paralisa e muchanan ora nan a conta con e madrasa di Hans y Greta, e bruha djente mahos huña preto vies, tabata menasa di come Hans y Greta cu weso y tur.

Danki na Aldric Wernet, Dientje Hassell y Richard Dabian, FBND D por a aña

un toke extra na e actividad; un cas casi mescos cu esun di Hans y Greta mes di hopi aña pasa.

Durante tur tres presentacion e contadonan tabata sa di gara e publico den trance y percura pa constante interaccion. FBND D a haya masha hopi comentario positivo di mayor y hopi peticion pa ripiti e actividad den otro bario. FBND D gustosamente lo cumpli cu e peticionnan aki asina ta, keda pendiente. Nos no por keda sin gradici e instancia y personanan cu a aporta na e exito di Tanto Cuenta. Tec Inc, Aldric Wernet, Dientje Hassell, Richard Dabian y sigur nos contadonan boluntario, cu a hinca alma y curpa den e presentacion, un danki di curason. □

